



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

09.09.2024. – 13.09.2024.

ODJELJENJE ZA BANKARSTVO, SLUŽBA FRONT OFFICE



Sarajevo, 16.09.2024. godine

SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA 09.09.2024. – 13.09.2024.


Tabela 1: Prikaz kretanja prinosa na državne obaveznice

Prinosi	Eurozona		SAD		Velika Britanija		Japan	
	6.9.24	13.9.24	6.9.24	13.9.24	6.9.24	13.9.24	6.9.24	13.9.24
2 godine	2,23	2,21	3,65	3,58	3,95	3,80	0,38	0,39
5 godina	2,05	2,02	3,49	3,43	3,77	3,62	0,50	0,51
10 godina	2,17	2,15	3,71	3,65	3,89	3,77	0,85	0,85

Tabela 2: Prikaz kretanja prinosa na njemačke Bubillove

Dospijeće	Prinosi	
	6.9.24	13.9.24
3 mjeseca	3,178	3,245
6 mjeseci	3,056	3,062
1 godina	2,678	2,691

Graf 1: Prikaz krivulja prinosa državnih obaveznica



Graf prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 13.09.2024. godine (pune linije) i 06.09.2024. godine (isprekidane linije). Na donjem dijelu grafa je prikazana razlika između vrijednosti odgovarajućih prinosa na navedene datume.

EUROZONA

Prinosi većine obaveznica eurozone nisu zabilježili veće promjene u odnosu na prethodnu sedmicu. Izraženiji pad prinosa zabilježili su prinosi španskih obaveznica (6–7 baznih poena) i prinosi italijanskih obaveznica (7–11 baznih poena). Na kretanje prinosa, pored održavanja sjednice ECB, priličan uticaj su imali i ekonomski podaci objavljeni za SAD uoči sjednice Feda. **ECB je na sjednici održanoj 12. septembra smanjila kamatne stope. Kamatna stopa na depozite banaka (DFR) je smanjena za 25 baznih poena na 3,50%. Preostale dvije kamatne stope su smanjene za po 60 baznih poena, te je kamatna stopa za kreditiranje banaka (MLF) smanjena na 3,90% sa 4,50%, a kamatna stopa za refinansiranje (MRO) na 3,65% sa 4,25%.** Prilagođavanjem razlike između kamatnih stopa DFR i MRO sa 50 baznih na 15 baznih poena, ECB nastoji da zadrži kontrolu nad tržišnim uslovima u vrijeme kada se njen bilans smanjuje (obustava kupovina obaveznica i povlačenje dugoročnih kredita). Iako inflacija bilježi postepeni pad, predsjednica Lagarde je ukazala na to da opasnosti još uvijek nisu prošle, te upozorila na ubrzani rast inflacije uslužnog sektora, koji je u augustu dostigao 4,2%. Lagarde je izjavila da je najnovija odluka bila jednoglasna, te da će ECB nastaviti da se vodi ekonomskim podacima, kao i da dalji pad kamatnih stopa nije predodređen, ni u smislu vremena, niti u smislu obima. Ipak, dodatno smanjenje kamatnih stopa na narednoj sjednici u oktobru nije isključeno. Tržišta su nakon saopštenja ECB blago umanjila očekivanja daljih smanjenja kamatnih stopa do kraja godine, dok se i dalje u potpunosti očekuje još jedno smanjenje za 25 baznih poena, ali je vjerovatnoća dodatna dva smanjenja sada ispod 50%. Nakon sjednice veći broj zvaničnika ECB je davao izjave o budućem kretanju

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

monetarne politike. Prema izjavama većine može se zaključiti da kreatori monetarne politike ECB sve više naginju ka smanjenju kamatnih stopa tek u decembru, iako još jedno smanjenje u oktobru nije u potpunosti isključeno.

ECB je objavila i nove kvartalne prognoze prema kojima i dalje iskazuje uvjerenje da će se cjenovni rast vratiti na ciljani nivo, ali su istovremeno smanjene prognoze ekonomskog rasta eurozone za sve godine do 2026. godine. Očekuje se da će stopa rasta BDP ove godine iznositi 0,8% (ranije očekivano 0,9%), u 2025. godini 1,3% (ranije očekivano 1,4%), a u 2026. godini 1,5% (ranije očekivano 1,6%). Prognoze inflacije su ostale nepromijenjene, te se u periodu od 2024. do 2026. godine očekuju godišnje stope inflacije od 2,5%, 2,2% i 1,9%, respektivno.

Na početku prošle sedmice bivši predsjednik ECB Mario Draghi je pozvao EU da investira i do 800 milijardi EUR dodatnih sredstava godišnje kako bi ovu regiju učinila konkurentnijom, kao i da bi trebalo da se obaveže na redovnu emisiju zajedničkih obaveznica kako bi bila konkurentna Kini i SAD, upozoravajući na “sporu agoniju“ bez takvih mjera. Ministar finansija Njemačke Linder je na ovakav prijedlog zajedničke emisije obaveznica EU odgovorio da takav pristup ne bi riješio strukturalne probleme i da bi to u konačnici dovelo do toga da Njemačka plaća za ostale. Dalje, Linder smatra da emisija zajedničkog duga prebacuje političku odgovornost za posljedice ekonomskih politika na nivo Evrope, te da bi to moglo da dovede do pretjeranog zaduživanja širom EU. Na kraju je naglasio da svaka pojedinačna članica EU mora nastaviti da snosi odgovornost za vlastite javne finansije. Podaci ECB su pokazali da je hipotekarno kreditiranje nastavilo da se oporavlja u julu, kada su banke odobrile 71 milijardu EUR vrijednosti kredita, što je najviše od augusta 2022. godine.

Nakon što se pojavila vijest o mogućem spajanju Commerzbank sa italijanskom UniCredit bankom, njemački sindikat uslužnog sektora Verdi je saopštio da je spreman da se snažno suprotstavi tome, te pozvao ministra finansija da blokira moguće preuzimanje kako bi se podržala Njemačka kao poslovna lokacija. Udio UniCredit u vlasništvu Commerzbank je do sada već postepeno povećavan i iznosi 9%.

Tabela 3: Kretanje ekonomskih indikatora za eurozonu

Red. br.	Ekonomski indikator		Očekivanje	Stvarno stanje	Prethodni period
1.	Sentix indeks povjerenja investitora – EZ	SEP	-12,2	-15,4	-13,9
2.	Stopa inflacije – Njemačka (G/G) final.	AUG	2,0%	2,0%	2,6%
3.	Stopa inflacije – Francuska (G/G) final.	AUG	2,2%	2,2%	2,7%
4.	Stopa inflacije – Holandija (G/G) final.	AUG	3,3%	3,3%	3,5%
5.	Stopa inflacije – Irska (G/G) final.	AUG	1,1%	1,1%	1,5%
6.	Stopa inflacije – Španija (G/G) final.	AUG	2,4%	2,4%	2,9%
7.	Stopa inflacije – Portugal (G/G) final.	AUG	1,8%	1,8%	2,7%
8.	Stopa inflacije – Grčka (G/G)	AUG	-	3,2%	3,0%
9.	Industrijska proizvodnja – EZ (G/G)	JUL	-2,3%	-2,2%	-4,1%
10.	Industrijska proizvodnja – Austrija (G/G)	JUL	-	-1,1%	-3,3%
11.	Industrijska proizvodnja – Italija (G/G)	JUL	-1,8%	-3,3%	-2,6%
12.	Industrijska proizvodnja – Španija (G/G)	JUL	0,4%	-0,4%	0,2%
13.	Industrijska proizvodnja – Irska (G/G)	JUL	-	5,6%	-19,1%
14.	Industrijska proizvodnja – Finska (G/G)	JUL	-	6,4%	2,8%
15.	Industrijska proizvodnja – Grčka (G/G)	JUL	-	10,6%	9,9%
16.	Industrijske prodaje – Holandija (G/G)	JUL	-	5,6%	-5,8%
17.	Prerađivačka proizvodnja – Holandija (G/G)	JUL	-	-4,4%	-5,0%
18.	Bilans tekućeg računa – Njemačka (u milijardama EUR)	JUL	-	16,0	20,6
19.	Potrošnja stanovništva – Holandija	JUL	-	1,1%	-1,1%
20.	Stopa nezaposlenosti – Italija (Q/Q)	II kvartal	-	6,8%	7,2%

SAD


U fokusu tržišnih učesnika protekle sedmice je bilo objavljivanje podataka o inflaciji u SAD, koji su ukazali na usporavanje inflatornih pritisaka, a što se odrazilo na smanjenje prinosa američkih državnih obaveznica duž cijele krive. Navedeni podaci su povećali očekivanja tržišnih učesnika da bi Fed na sastanku ove sedmice mogao smanjiti referentnu kamatnu stopu za 50 baznih poena.

Potpredsjednik Feda zadužen za superviziju Barr je izjavio da će američki regulatori donijeti značajne promjene u vezi sa pravilima kapitala banaka, odnosno da će prepoloviti očekivani uticaj na najveće banke i izuzeti manje banke od većeg dijela ovih mjera. Osam najvećih banaka, uključujući Citigroup, Bank of America i JPMorgan Chase će sada biti suočene sa povećanjem kapitala od 9%, znatno ispod prvobitno predloženih 19%. Druge veće banke će se suočiti sa povećanjem 3-4%. Bivši zvaničnik Feda Dudley je izjavio da postoji jak razlog za smanjenje kamatnih stopa za 50 baznih poena sljedeće sedmice. MMF je saopštio da je odgovarajuće za Fed da započne dugoočekivani ciklus smanjenja kamatnih stopa na dolazećoj sjednici jer su inflatorni rizici iščezli, a MMF očekuje usporenje ekonomskog rasta u SAD do kraja ove godine.

Tabela 4: Kretanje ekonomskih indikatora za SAD

Red. br.	Ekonomski indikatori		Očekivanje	Stvarno stanje	Prethodni period
1.	Stopa inflacije (G/G)	AUG	2,5%	2,5%	2,9%
2.	Temeljna inflacija (G/G)	AUG	3,2%	3,2%	3,2%
3.	Indeks proizvođačkih cijena (G/G)	AUG	1,7%	1,7%	2,1%
4.	Veleprodajne zalihe (M/M) F	JUL	0,3%	0,2%	0,1%
5.	Indeks cijena uvezenih dobara (G/G)	AUG	0,9%	0,8%	1,7%
6.	Indeks cijena izvezenih dobara (G/G)	AUG	1,4%	-0,7%	1,2%
7.	Broj inicijalnih zahtjeva nezaposlenih za pomoć	7. sep	215.000	211.000	222.000
8.	Broj kontinuiranih zahtjeva nezaposlenih za pomoć	31. aug	1.850.000	1.850.000	1.845.000

Graf 2: Kretanje kursa EURUSD tokom protekle sedmice



USD je aprecirao u odnosu na EUR, te je kurs EURUSD zabilježio pad sa nivoa od 1,1084 na nivo od 1,1075.

VELIKA BRITANIJA

FTSE 100 je prošlog ponedjeljka povećan nakon šest uzastopnih dana kontinuiranog smanjenja. Ovo je potaknuto rastom vrijednosti akcija iz sektora turizma i zabave, naročito akcija kompanije Entain. Tržište rada pokazuje znakove "hlađenja", a rast plata se usporava, što ide u prilog mogućem smanjenju kamatnih stopa BoE. Investitori potiču BoE da proširi opseg obaveznica koje prodaje kako bi povećala likvidnost tržišta jer planira da smanji svoj bilans. Očekuje se da BoE na septembarskom sastanku objavi planove za smanjivanje bilansa za 100 milijardi GBP godišnje u toku naredne godine. Starmer je upozorio trgovinske unije u Velikoj Britaniji na ograničenja daljeg rasta plata za radnike u javnom sektoru zbog finansijskih ograničenja.

Ekonomija Velike Britanije zabilježila je u julu neočekivanu stagnaciju (0,0%) drugi mjesec zaredom, iako je očekivan blagi rast, što predstavlja izazov za novoizabranu laburističku Vladu koja je obećala da će ubrzati rast ekonomije. Stagnacija je izazvana pogoršanjima u sektorima građevinarstva i prerade. Prema podacima Kancelarije za nacionalnu statistiku, sektor usluga je "porastao", ali za samo 0,1%, industrijska proizvodnja je smanjena, a deficit trgovinskog bilansa povećan. Ovo predstavlja nastavak stagnacije iz juna i naglašava poteškoće s kojima se suočava kancelarka Reeves dok priprema prvi budžet laburističke Vlade.

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

Banke Velike Britanije pozajmile su rekordnih 38 milijardi GBP putem sedmičnih repo poslova BoE, nagovještavajući potencijalno smanjenje likvidnosti na tržištu novca. BoE je revidirala svoje inicijalne prijedloge za kapitalne zahtjeve u Bazelu III, te ponovo odložila početak njegove primjene za još 6 mjeseci, tj. za početak 2026. godine. Zbog zahtjeva banaka, izvršena su prilagođavanja (smanjenja) zahtijevanog kapitala u oblasti pozajmljivanja malim firmama, u oblasti hipoteka i pozajmica za infrastrukturu. Kao rezultat toga, zahtijevani pragovi bit će gotovo nepromijenjeni, odnosno povećani za manje od 1%, umjesto prethodno očekivanih 3%.

Kvartalno istraživanje o očekivanjima inflacije je pokazalo da su u augustu očekivanja za predstojeću godinu smanjena na 2,7% sa 2,8%, koliko su iznosila u maju. Ovo je najniži nivo od augusta 2021. godine. Očekivanja za narednu godinu su ostala na nivou od 2,6%, ali su očekivanja za narednih 5 godina povećana na 3,2% sa 3,1%. Većina analitičara predviđa da će kamatne stope na ovosedmičnom sastanku biti zadržane na nivou od 5%, nakon čega će kasnije ove godine uslijediti smanjenje od 25 baznih poena. Mišljenje javnosti o pristupu koji ima BoE u vezi sa rješavanjem problema inflacije postalo je u augustu pozitivno prvi put u posljednje više od dvije godine.

Tabela 5: Kretanje ekonomskih indikatora za UK

Red. br.	Ekonomski indikatori		Očekivanje	Stvarno stanje	Prethodni period
1.	Sedmične zarade bez bonusa u 3 mjeseca (G/G)	JUL	5,1%	5,1%	5,4%
2.	Zahtjevi nezaposlenih za pomoć	AUG	135.000	23.700	102.300
3.	BDP (M/M)	JUL	0,2%	0,0%	0,0%
4.	Industrijska proizvodnja (G/G)	JUL	-0,1%	-1,2%	-1,4%
5.	Prerađivačka djelatnost (G/G)	JUL	-0,1%	-1,3%	-1,5%
6.	Građevinska djelatnost (G/G)	JUL	-0,7%	-1,6%	-1,7%
7.	Indeks uslužnog sektora (M/M)	JUL	0,2%	0,1%	-0,1%
8.	Trgovinski bilans (u mlrd GBP)	JUL	-5,1	-7,5	-5,3

Tokom protekle sedmice GBP je aprecirala u odnosu na EUR, pa je kurs EURGBP zabilježio pad sa nivoa od 0,84418 na nivo od 0,84391. GBP je blago deprecirala u odnosu na USD, pa je kurs GBPUSD smanjen sa nivoa od 1,3129 na nivo od 1,3124.

JAPAN

Prošle sedmice je objavljen revidirani podatak o rastu BDP-a Japana u drugom kvartalu (0,7%), koji je malo manji od preliminarnog (0,8%). Ovo oslikava manju potrošnju kompanija i stanovništva i moglo bi predstavljati izazov za planove BoJ da poveća kamatne stope. Bez obzira na ovakve revidirane podatke, većina ekonomista i dalje očekuje nastavak povećanja kamatnih stopa BoJ do kraja godine. Zvaničnici BoJ ne vide veliku potrebu za povećavanjem referentne kamatne stope na predstojećem sastanku jer se još uvijek posmatra volatilnost tržišta i uticaj julskog povećanja. Kako BoJ usporava kupovinu duga, lokalni investitori rade suprotno, ograničavajući pritiske koji izazivaju rast prinosa obaveznica. JPY je u srijedu dostigao najvišu vrijednost naspram USD od početka ove godine nakon komentara člana MPC BoJ Nakagawe, kojima je on ipak nagovijestio moguća prilagođavanja monetarne politike, što je protumačeno kao znak mogućeg povećanja kamatnih stopa. Ministrica inostranih poslova Kamikawa objavila je namjeru da postane prva žena premijer u Japanu, a njeni ciljevi su jačanje mjera za snižavanje cijena i jačanje realnih plata. S obzirom na dominaciju LDP stranke u skupštini, može se reći da će njen vođa gotovo sigurno postati i premijer. Pobjednik će se suočiti sa izazovima kao što su održavanje veza sa Kinom, starenje populacije, te visok javni dug. Vodeći kandidat na predstojećim izborima Liberalne demokratske stranke Takaichi podržava zadržavanje stimulativne monetarne politike BoJ. Ona smatra da inflaciju potiču visoke cijene robe, te da će rastuće kamatne stope uskoro početi da predstavljaju opterećenje za mlade kupce kuća i za biznise.

Rumunija će u četvrtom kvartalu izdati svoju prvu obaveznicu denominovanu u JPY (Samurai bond), nakon što su to nedavno uradile Mađarska i Slovenija.

Tabela 6: Kretanje ekonomskih indikatora za Japan

Red. br.	Ekonomski indikator	Očekivanje	Stvarno	Prethodni	
			stanje	period	
1.	BDP (Q/Q) F	2. kvartal	0,8%	0,7%	-0,6%
2.	BDP sveden na godišnji nivo (Q/Q) F	2. kvartal	3,2%	2,9%	-2,4%
3.	BDP deflator (G/G) F	2. kvartal	3,0%	3,2%	3,4%
4.	Bilans tekućeg računa (u mlrd JPY)	JUL	2498,0	3193,0	1533,5
5.	Monetarna baza M2 (G/G)	AUG	1,4%	1,3%	1,5%
6.	Monetarna baza M3 (G/G)	AUG	0,9%	0,9%	1,0%
7.	Porudžbine mašinskih alata (G/G) P	AUG	-	-3,5%	8,4%
8.	Indeks proizvođačkih cijena (G/G)	AUG	2,8%	2,5%	3,0%
9.	Industrijska proizvodnja (G/G) F	JUL	2,7%	2,9%	-7,9%
10.	Iskorištenost kapaciteta (M/M)	JUL	-	2,5%	-3,1%

JPY je tokom protekle sedmice aprecirao u odnosu na EUR, te je kurs EURJPY zabilježio pad sa nivoa od 157,77 na nivo od 156,00. JPY je aprecirao i u odnosu na USD, te je kurs USDJPY zabilježio pad sa nivoa 142,30 na nivo od 140,85.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 67,67 USD (61,05 EUR).

Tržište nafte je bilježilo volatilna kretanja tokom prošle sedmice. Nakon što je u sedmici ranije zabilježila priličan pad, na otvaranju tržišta u ponedjeljak cijena je korigovana naviše zbog zabrinutosti da bi vremenske neprilike na obali SAD mogle da poremete proizvodnju, što je uticalo na to da kompanije kao što su Chevron, Exxon i Shell povuku radnike, obustave aktivnosti na bušotinama i zatvore neke izvore. U prilog rastu cijene nafte idu i poremećaji snabdijevanja u Libiji. S druge strane, na ovo tržište utiču i dalje prisutne zabrinutosti zbog slabe globalne potražnje, kao i nedavno smanjenje prognoza Morgan Stanley za cijenu nafte u IV kvartalu na 75 USD. BofA je objavila da bi OPEC+ mogao iskoristiti povećanje proizvodnje nafte kao sredstvo da možda u konačnici sa tržišta izbací proizvođače sa visokim troškovima proizvodnje. Cijena nafte je u utorak smanjena za preko 4% dnevno, na nivo ispod 66 USD, što je najniže od decembra 2021. godine. OPEC je smanjio prognoze potražnje nafte za ovu godinu, drugi mjesec zaredom, te sada očekuje da će potražnja rasti za oko 2 miliona barela dnevno, manje od 2,1 milion barela, koliko je očekivano u augustu. Prognoze OPEC-a su i dalje optimističnije od IEA koja prognozira rast od nešto ispod 1 milion barela dnevno. U srijedu i četvrtak cijena je uspjela da se oporavi zbog špekulacija da bi OPEC+ mogao dodatno smanjiti proizvodnju, a Citi Bank je objavila da će OPEC+ možda morati da smanji proizvodnju za dodatnih 1 milion barela dnevno sljedeće godine ukoliko želi da izbalansira tržište usljed dodatnih količina koje se proizvode van ove grupacije. Cijena je povećana i zbog zabrinutosti u vezi sa uticajem uragana Francine na proizvodnju u SAD. Međutim, kako oluja jenjava, pažnja se usmjerava na problem smanjenja potražnje. Mjesečni izvještaj sa tržišta nafte koji objavljuje IEA, ukazuje na to da usporavanje ekonomije Kine smanjuje izgleda za rast globalne potražnje za naftom, ističući da je rast potražnje na najnižem nivou od perioda pandemije. Na kraju sedmice cijena nafte je blago smanjena.

Na zatvaranju tržišta u petak cijena jednog barela sirove nafte je iznosila 68,65 USD (61,99 EUR), što predstavlja prvi sedmični rast u posljednjih 5 sedmica, koji je iznosio 1,45%.

Graf 3: Kretanje cijene nafte tokom protekle sedmice



Na otvaranju londonske berze metala u ponedjeljak cijena jedne fine unce zlata je iznosila 2.497,41 USD (2.253,17 EUR).


Cijena zlata je bilježila svakodnevni rast tokom prošle sedmice. Do srijede rast nije bio posebno izražen jer su investitori bili fokusirani na objavljivanje podatka o kretanju inflacije u SAD, koji bi mogao biti signal za promjenu monetarne politike Fed. Tako se cijena stabilizovala na nivou oko 2.500 USD tokom prva tri dana u sedmici. Nakon što su objavljeni podaci o inflaciji za SAD, koji su uglavnom bili u skladu sa očekivanim padom, cijena ovog plemenitog metala je nastavila da bilježi rast do kraja sedmice. U četvrtak je dostigla novu rekordnu visoku vrijednost od 2.550 USD, da bi se na kraju sedmice povećala na novi rekordno visok nivo od skoro 2.578 USD po jednoj finoj unci. Rast cijene zlata u petak je bio potaknut slabijim USD, padom prinosa u SAD, ali i špekulacijama da bi Fed mogao donijeti odluku o većem smanjenju kamatnih stopa na septembarskoj sjednici (50 baznih poena).

Na visoku potražnju za zlatom ukazuju i aktivnosti investitora. Manji investitori nastavljaju da kupuju fjučerse na zlato, te je zaključno sa 11. septembrom prosječan dnevni obim naloga iznosio preko 99.000, što takođe predstavlja novi rekord. Prethodni rekord od 86.000 naloga je zabilježen u 2020. godini.

Objavljeno je da je Centralna banka Kine, već četvrti mjesec, u augustu pauzirala kupovine zlata, iako je vrijednost zlatnih rezervi ove banke povećana zbog rastućih cijena. Centralna banka Gane je povećala zlatne rezerve na 65,4 tone, tri godine otkako je donijela program za kupovinu domaćeg zlata (DGPP). U prvoj polovini 2024. godine su kupljene 23 tone, a navedeni program je uveden s ciljem poboljšanja deviznih rezervi i stabilizacije domaće valute.

Na zatvaranju tržišta u petak cijena jedne fine unce zlata je iznosila 2.577,70 USD (2.327,49 EUR), što predstavlja povećanje od 3,21% na sedmičnom nivou.

Graf 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.